

崔舍人玉堂類稿

江蘇古籍出版社



卷八
詩人王逸集

四庫未收書提要

擘經室外集卷四

玉堂類藁二十卷西垣類藁二卷提要

宋崔敦詩撰敦詩字大雅本河北人南渡後遂居溧陽登紹興進士官至中書舍人李心傳朝野雜記謂呂祖謙文鑑既成近臣密啓其失因命直院崔大雅更定增損去留凡數十篇朱子語類亦云祖謙編錄文鑑有敦詩刪定之語敦詩淳熙九年致仕故宇文价所作告中稱其才猷敏贍問學淵深是編所載宋孝宗時制誥口宣批答青詞甚詳諸家書目皆未著錄而宋史藝文志誤為周必大所撰明葉盛萊竹堂

書目曾列其書是明中葉尚有傳本此為活字板其
文皆必大集中所未有也

崔舍人玉堂類藁卷第一

內制

王淮除樞密使制

門下象著三辰斗極上通於帝紀政分二柄機廷
內總於兵權朕振長策以御邦綜大綱而撫世永惟
軍國之任竝繫安危之圖茲有良臣久司右府旣協
同於人望亦灼見於朕心遂升班聯乃重委寄涓以
吉旦諗于羣倫具官王淮剛正而守中高明而持重
質諸天地言顧行以無慙發自朝廷實浮名而有裕
曩踐政路歷宣賢勞調娛萬微綏靖四國逮進登於

宥密益具罄於忠嘉尊俎之畫消難於未形帷幄之言進規於不逮事必汝訪謀無予欺邦其尊榮民以寧壹朕稽參古誼簡畀事權勃輔漢家實倚本兵之重蠡謀越國亦專主外之長是用誕頒恩書升正使號式序爾位亞端揆以同登克壯其猶秉神樞而獨制仍陪戶邑併陟文階是由至懷庶表優禮於戲賢人之業可大副予體貌之崇天下之務惟幾藉爾精神之運勉堅壹意汔底多盤可特授樞密使太中大夫依前東陽郡開國公加食邑一千戶食實封四百戶主者施行

皇叔祖士歆除節度使制

門下朕恢崇王化，棐迪民彝，高廟神靈，仰慶源之有遠。周家忠厚，閱宗室之多賢。眷我茂親，繫時令望。錫是褒典，告于治朝。皇叔祖具官士歆，天稟粹資，世憑華問，長富貴之守汔，無流心服。詩書之聞，克有常德。約已自循，於防範會朝，不爽於威儀，率其賢猶。昭乃燕譽，朕顧視在列，慨興自懷。念東平之世家，是存典則。攷南陽之帝屬，茲見老成。維歲月之深長，曾寵光之未繼。是用稽仁祖推恩之詔，酌徽皇考績之常。斷於深衷，渙此茂命。披圖按地，肇開舊甸之藩。揆日□

壇顯授元戎之節仍加采邑併衍真奮口循成規口
示優禮以重犬牙之勢以崇麟趾之風於戲保乂我
家有衍蕃昌之緒虔恭爾位無忘敦叙之盟尚迪前
修益綏後福可特授保康軍節度使依前提舉佑神
觀加食邑五百戶食實封二百戶封如故主者施行

趙雄轉官加恩制

淳熙六年四月五日係國
史日歷所修纂到隆興以

後日歷奏成
篇秩轉一官

門下良史立編年之法日繫月而事明聖王持厲
世之權賞當勞而下勸眷維元輔方秉洪鈞迨茲載
筆之書嘉乃提綱之績爰推茂典咸告明廷具官趙

雄敦大而直方宏深而開亮守持仁義會歸六籍之
醇奮發文章度越百家之上膺受帝賚延登宰司迪
忠純之度而鎮定四方闢公正之門而甄序庶位繫
爾熙績維予仰成朕祇荷慈謀紹膺寶位志勤道遠
念歲月之深長業鉅事叢賴簡編之有紀嘗詔紬書
之彥趣聞汗竹之期曾不淹遲汔茲告備藏之金匱
雖天子之不可觀副在京師將後來之有足證肆稽
故實並答勤勞是用涓以剛辰渙茲顯號進陟文階
之峻陪敦戶食之豐咸輯榮章用昭優禮亶維國體
亦重民瞻於戲君舉必書每深懷於兢畏衮職有□

尚終藉於彌縫庶集勲庸益光方冊可特授正奉□
夫依前右丞相魯郡開國公加食邑一千戶食實封
四百戶主者施行

王淮轉官加恩制

同前

門下聖人之道布方冊事乃著於無窮王者之賞
酬勲庸法宜先於自近眷言英館適告成編維今輔
翼之臣有昔纂修之績逮議勞而錫寵廼出命以揚
廷具官王淮資正而行恭量宏而識邃萃天地之和
氣悉集于躬究古今之道原遂臻其奧延登與政超
冠本兵從容聲氣而多整暇之規密勿謀謨而見深

長之慮國所嘉賴民其具瞻朕率循彝章遴選羣彥
迭居遞宿俾並聚承明之庭廣記備言乃汔成傳信
之典比觀剡奏已就珍藏審篇帙之寢繁撫歲年之
逾邁治弗加進曾敢怠於圖回史不絕書將何堪於
紀述豈伊碩輔可廢前勞是用卜涓剛辰推畀茂典
既厚加田之富仍超進秩之崇萃厥寵榮光其翰墨
亶維國體適協予懷於戲春秋謹嚴既具循於筆削
夙夜宥密尚深勉於贊襄克咸厥功同底于道可特
授通議大夫依前樞密使東陽郡開國公加食邑一
千戶食實封四百戶主者施行

趙雄轉官加恩制

淳熙六年七月二十二日
勅令所修進一州一路

賞格法
轉一官

門下朕統萬宇以建中摹百王而作則設官庀事酌
求憲度之宜涓日奏篇鋪閱章程之備悉條功緒優
答勞能爰䟽進律之恩首逮提綱之宰渙此丕冊告
于明廷具官趙雄才鉅而識高器全而量遠望王商
之威重自見中朝之尊資元齡之智謀乃能大事之
斷攄爾賢緼調予化元忠勤載于王家潤澤施于方
夏朕並建官師之重外釐職務之繁四方是維既因
宜而辨等三尺安出亦量事以疇庸居樂土而猶號

要荒當平世而尚憂邊鄙仍久經於歲月已浸失於
科條委曲私情蔓延竒請嘗令刊定汙告裁成損益
畢協其中重輕各隨其當有勞必賞士安意於脩方
無隙可容吏沮心於舞法更存彝典之舊徐俟它時
之行凡豈予能良皆汝作旣懋功而自近盍出號以
居先是用協于至懷加以顯命峻文階而進位拓采
戶以增畚益聳羣瞻具昭優禮於戲政無常善固宜
參合於事情令有必行時乃綱維於國體宋璟以守
文而隆至治裴垕以持法而贊中興罔俾先民遂專
前美可特授宣奉大夫依前右丞相魯郡開國公加

食邑一千戶食實封四百戶主者施行

皇叔祖士輅明堂轉官加恩制

門下朕覽簡策之傳達神明之德奉聖以進魯史先
九族之親徹豆而歸周詩同諸父之樂比涓商序初
饗合宮重陰開禩廟之辰杲日麗登樓之旦嘉應顯
答美祥大來逮敷祭澤之行宜厚宗盟之長具官士
輅行恭而志飾資粹而量閱樂以詩書自秀慶靈之
胄守其富貴不踰法度之閒夙和順以積中迄耄期
而稱道朕仰懷英廟追厚濮園三靈之休燕及於苗
裔萬代之祀同符於祖宗眎其象賢嘉乃耆老慨歲

年之逾邁閱寵數之未隆是用因此熙成優於商賚
琬戈導節仍開名壤之藩通帛舒旌高進亞師之位
陪敦井實申衍戶畚於戲東西九筵旣擁純釐之下
本支百世遂膺景福之同尚服殊私益綏吉履可特
授少師依前昭化軍節度使充醴泉觀使嗣濮王加
食邑七百戶食實封三百戶令所司擇日備禮冊命
主者施行

皇兄居廣明堂轉官加恩制

門下朕練辰商籥蠲饗合宮順昆侖以登祗見上帝
躡泰階而下宣延羣神于時太宗小宗伯父叔父□

奔走恭事或肅雍侍成肆哀順備之休爰厚神明□
胄具官居廣端方而和裕夷易而醇深樂善有休獨
標玉葉之秀流光自遠茂迪璿源之長居無驕溢之
心動有寅恭之度朕奉承慶緒監用丕彝隆形勢於
本朝臨制夷夏合親族於高位顯榮邦家推原瓜瓞
之來興念常華之近是用因茲惠術厚以恩章犀甲
熊旗仍領名藩之重篆車希冕超登亞傅之崇併衍
爰田更增真食於戲天地並況豈予涼菲之能兄弟
具來實爾柔嘉之則尚膺同福益固純猶可特授少
傅依前岳陽軍節度使充萬壽觀使永陽郡王加食